

豐城縣志卷之十

人物二

宋

李義山字伯高以父修己澤補將仕郎登嘉定進士授
大宗正兼金部輪對言爲善不可有疑心去惡不可
有悔心歷陳進善不能無疑者三去惡不能無悔者
三末復上四事由是罷歸奉冲祐祠知吉州正版權
之詭僞在湖南以提舉攝帥漕楚俗尚鬼淫祠煖婆
假禍福惑人義山曰此張角孫恩之漸也斬妖覘譚
法祖燬其祠歷官江淮都大提點坑冶階至中大夫

豐城縣志

卷十 人物

一

爵豐城男號後林子瀛清介自守官至贛州通判
熊恪字子敬官店里人朱文公帥長沙道清江謀館客
於彭忠肅彭以恪薦以有宿諾辭文公義之張元德
洽幼師事之恪平居常習和緩以調柔此心發言舉
動不敢急疾食時放七箸亦不使作聲嘗云學不遷
怒之法有二平日當涵養臨事當持守又嘗爲忍銘
以示元德元德荅曰古云乳犬攫虎伏雞搏狸精誠
之至也但恐學者知忍而不知行其所當忍今欲勗
以懲忿之箴而復揭忍以爲懲忿之訣庶幾無弊然
忍之一字施之于洽則有救偏之功而先生守之則

幾於終身。誦之之固。恪遂作懲忿說。學者稱謹節先生。

袁漸字伯賢。菟湖人。舉嘉定九年鄉薦。特奏授嚴州文學。廣州清遠尉。改瀏陽高安二縣丞。主管廣漕帳司。辟英德推官。安東判官。改清海判官。權德慶府以通材守廉。振頹綱理。凋瘵補綱。欠蠲事例。所至有聲。歷諸處。決累年不決之事。蓋一時之能宦也。子浩。頤。登進士。主龍川簿。

徐鹿卿字德夫。後泉里人。博通經史。以文學名。後進爭師宗之。嘉定進士。有司第其對。居二詳。定官以其直。

豐城縣志

卷十 人物

二

抑置第十。調南安軍學教授。張九成嘗以直道謫居。鹿卿摭其言行刻諸學以訓。先是濂溪二程皆講學是邦。鹿卿申其教。由是義理之學復明。學田多在溪峒。征之無藝。農病之。鹿卿撫卹無逋租者。改福建安撫使。幹辦公事。郡多火災。救護有方。會都城火。應詔上封事。言積陰之極。其證爲火。指言惑寵嬖。溺燕私。用小人。三事尤切。改知尤溪縣。真德秀帥閩。辟宰南安。首罷科歛之無名者。明版籍。革預借。決壅滯。達冤抑。邑大治。歲饑。處之有法。民無死徙。德秀疏其政。以勸列邑。以母喪去服。闋。主管官誥院幹辦諸事。審計。

司遷國子監主簿。入對陳六事。曰洗凡陋以起事功。昭勸懲以收主柄。清班署以儲實才。重藩輔以蔽郡邑。用閩越舟師以防海。合東南全力以守江。上皆嘉納。改樞密院編修。官權右司。會方大修。劉克莊王邁以言事黜。鹿卿贈以詩。爲言者所劾。大學諸生作四賢詩以美之。改右侍郎兼右司。又極言當時竝相之弊。宰相以甘言誘之。鹿卿退語人曰。是牢籠也。吾不能爲宰相私人。言者以他事詆鹿卿。主管雲臺觀。起爲江東轉運判。歲大饑。人相食。鹿卿命掩捕食人者。又出倉粟減市值之半以糶。秋乃糴償。諭民收養遺

棄出緡錢萬有七千。以予貧民。所活數萬人。遷浙西提點刑獄。史彌遠之弟通判温州。利韓世忠家寶玩籍之。鹿卿奏削其官。一時凜然見憚。改崇政殿說書。輪對論儲。相謂侍從者執政之儲。執政者宰相之儲。當擇人才之有學力才力心力者。學欲其正而通。才欲其弘而毅。心欲其公而大。經筵講棠棣詩。反復天理人心之變。爲濟邸發也。改直寶章閣。知寧國府。擢太府少卿兼右師。入對請定國本。正紀綱。立規模。時事多艱。人心易搖。無獨力任重之臣。無守節仗義之士。願早決大計。上嘉納之。兼中書門下省檢正。諸房

公事。逾年。權吏部侍郎。以疾。旬祠。遷右文殿修撰。知平江府。召權禮部侍郎。累疏告老。進文華閣待制。卒。贈四官。鹿卿居家孝友。喜怒不形。恩怨俱泯。宗族鄉黨各得歡心。居官廉約清峻。毫髮不妄取。一廬僅庇風雨。嘗謂心爲百行之原。持心不平。處事必偏。故未嘗先立意見而處事。接物各得其理。不爲崖異矯激之行。而屹然自立者。不可囿奪。不爲甚高難行之論。而犁然當理者。不可移易。仕宦二十年。歿之日。家無餘貲。謚清正。爵國男。

徐應雲字平仲。栗塘人。舉嘉定十五年鄉薦。以恩科授

豐城縣志

卷十 人物

四

瀏陽尉。憲司有死獄久不決。檢覆至四五訴者。不已。委應雲聚檢。臨示審察。驗至兩脛骨。俱左足。荆上之前。所委官皆失色。獄由是得明。

王休字致美。城頭里人。舉嘉定九年鄉薦。兩擢第一。下筆千言。一旦盡焚。去取睂山集讀。累月爲文。沛然似之。作心要十篇。貴王而賤羈。表忠而墜佞。著誠而惡僞。以晏子踊貴。屢賤之言爲藥石。以相如子虛大人之賦爲酒色。謂淵明不夷不惠。爲避世之尤。謂仲舒劉蕢之策。或緩或激。皆愛君之實識者是之。

徐經孫字仲立。號矩山。璿之子。登寶慶進士。授瀏陽主

簿潭守俾部牙契錢至州有告者曰。朝廷方下令須行七十界。會令若此錢皆用會小。須則幸而獲大利矣。經孫曰。此錢取諸保司出諸公庫。吾納會而私取其錢。外欺其民。內欺其心。奚可哉。詰旦即以所部錢上之。陞監察御史。劾京尹厲文翁言僞而辨疏留中。宣諭至再。即日出關。上遣使追之不及。召爲秘書監。太子諭德遷給舍。論謝堂不宜以后族。次對西清。董宋臣不宜以近倖與兵柄。陞太子詹事。敷陳經義。隨事啟迪。景定三年。春雷。詔求直言。經孫對曰。三數年來論者以靖共爲主。有懷者以譁計爲戒。忠讜之氣

鬱而不得行。上帝降監。假雷以鳴。切中時弊。時賈似道議買公田以省糴運。經孫極論非便。忤似道。除翰林學士。知制誥。未踰月。諷御史舒有開奏免。授端明殿大學士。閒居十年。卒。贈金紫光祿大夫。爵豐城伯。謚文惠。經孫既貴。不治產業。身歿蕭然。時著作郎陳著亦乞罷買公田坐補外。經孫所薦陳茂濂爲公田官。在嘉興。聞經孫去國曰。我不可以負徐公。遂以親老謝歸。終身不起。時人稱爲三立。

雷璲字彥寶。城陂人。兩舉鄉貢。特奏授澧州司戶。璲嘗有貸於人。既死無知者。一日攜金以償其子。謝曰。無

有。璲曰：尊公實知之。固辭委金而去。子宜中、黃千能字必強，黃臺人，刻意讀書，嘗謂皇極九疇之統，漢儒舉以參五事，配六極則失之，妄作皇極要論，謂古今地理無一定之形神，禹疏河之故道蕪沒而難考，作禹圖說雜著尤多。

徐端方，字矩叔，吳塘里人。弱冠以文學見知泉谷。徐公舉胄監矩山，徐公引爲賓客。晚歲號絜矩，病叟叙平生大略，授其子。俟屬續刻石，超然無所芥蒂。一日，手書忠孝大致數百言，命酒家人小集，明日冠帶索紙，筆書曰：若以爲了多少未了，以爲未了，何時而了。題曰：了了。道人自贊，歛筆硯而逝。

按省志作徐端。

甘茂榮，字榮可，九里人。少從李登授學，同族兄癸俱擅文名。紹定戊子，師生兄弟同與鄉薦。壬戌登進士，調常德府戶曹，轉江西兵馬鈐轄司幹官。戊午爲吉州發解官，於黜卷中得劉辰翁所爲文，欲置第一。典文項汝明爭之不勝，詬之，項不勝忿，劾奏以顯，斥丞相丁大全削籍，謫九江。江萬里爲言於朝，改京學教沿江制司。廣東經畧幹官，以文學自任，有節操。剛介寡諧，意所不可，雖達官要人不造焉。

王孝友字順伯東山人。受春秋於大父西溪公。凡陰陽造化之奧。性命道德之蘊。必洞究其原。文清公李宗勉不妄交納。屢致書幣聘之。說齋李稟鶴山魏了翁與之定交。鶴山稱爲修士。自號平菴。著性理彝訓造化六合論。海潮論。撮古今名臣事蹟爲正監。哀風土人物爲豐水志。卒泉谷。徐鹿卿誌其墓曰。博學而老於文。識明而裕於才。使得階一命以行其志。經術吏事。當不在董仲舒雋不疑下。弟孝恭字敬伯。著小學名數書。有益於後學。

雷宜中字宜叔。師張洽。得朱子緒餘。居貧爲養。授徒於

鄉端平乙未補太學生。史嵩之以右相開督府。陰植奸黨。弟岩之尹京。勢焰熏灼。可嘖笑。生殺人會天變。宜中上書斥其奸。約同舍生俱初從者十九。繼十七。最後十。無二三。宜中氣益壯。由是流落久之。淳祐登進士第三。人爲右司諫。時賈似道初相。收召知名士。不附己者輒斥。似道帥江陵。宜中在記室。裨贊言無不從。至是事有不便。必過閣論。正以意不合。去經畧。廣東北還。捐俸買田以給桐江書院。入奏言廣東進上供銀大率抑買爲民害。有旨蠲之。又乞復故相吳潛官。賜美謚以勵臣節。復濟邸封爵以厚天倫。錄江

西二陸之後。以勸學者。德祐初。除禮部尚書。尋爲廣東經略安撫使。偕文丞相起義兵。勤王。會丞相入衛。又與信州謝枋得招諭軍民。固守嶺嶠。元游騎至。時宜中子韶州通判國乘與弟國武相失。俱不知所終。宜中與元兵力戰。病臂創踰月而卒。爵豐城男。初以省身名齋。晚號厂山。爲人魁岸。議論慷慨。剛毅難犯。而引進後學不倦。里中龍澤山徐孺子。胡文定講學其地。乃建書樓祠孺子諸賢。藏書萬卷。會革命崎嶇。嶺嶠以沒。故部曲黎應豐太學生。南昌羅實經紀之。藁葬黎村。越十年。返葬易棺。貌如生。

豐城縣志

卷十 人物

八

范嚴字子嚴。查村人。舉淳祐進士。方試禮部。伏闕上書。言上下之交。以術相籠。不以心相體。以氣相承。不以理相從。條陳十事。曰。嚴資善之訓教。絕黨惡之議論。選宰執。以盡君子之用。重臺諫。以固君子之交。責監司。以清利弊。擇重臣。以壯邊闔。廣畊屯。以招流散。收碎會。以便交易。謹舉措。以重宗廟。續恩意。以篤天倫。既第。復上書曰。當今之時。可爲治世。惜者五。謂公論脉絕。正人引去。輕厭學校。庇護嵩之創。龍翔觀。可爲明主。危者六。謂敵國窺江。寇循海道。楮幣折閱。浙右盜賊軍驕。而紀律不嚴。拒言而人不敢諫。末言周室

漢唐六朝享國世運短長。亶亶萬言。憤激忠愛。敢言之士也。仕至臨川主簿。

徐子端字克之鹿卿子。由世祿入仕。初調監烏青鎮。時朝廷更造楮幣漕司責以日解權木葉一千斤。鎮地屬安吉嘉興三郡。催吏旁午子。端謂上之使下。必度其力。責之于其所有者。易求之于其所無者難。累請得減半。又兩月乃免。再調黃州推官。所在見稱。授宣教郎。知善化縣事。革命後杜門讀書。作後泉散人傳。引蔡季通獨行不愧影。獨寢不愧衾之語。以自儆。弟子中字益之。由承務郎。三監黃花鎮。咸淳甲戌挈家豐城縣志

卷十 人物

九

之官。明年元兵陷當塗。子中闔門死之。

徐伯琛字通父。吳塘人。主一張公洽。以其子妻之。因授業焉。嘗語之曰。讀書自有見處。須盡捐富貴之習。見自昔聖賢之心。讀論語。則如親見孔子。讀孟子。則如親見孟子。因言求意。方不枉讀。受教左右數年。修身踐言。如恐不及。家故聚書。增置益富。建閱浩閣。以貯之。荆齋曰。東林有花竹之勝。家不踰中人。而買書。廷賓。賙貧。施藥。不吝不足。則立質以繼。景定四年。明禋恩授。廸功郎。年九十三卒。

陳杰字燾。父干陂人。登淳祐進士。授贛州簿。知江陵縣。

累官工部郎中。江西憲使兼制司叅謀。轉朝散大夫。召赴行在。未行革命。隱居東湖。乃取所爲詩。刪定有補於詩教者。爲自堂存稿。

胡仲伯。羅塘人。知浮梁縣通判。建昌軍宏之父。初宏任高安簿。給俸不時。仲伯戒之曰。昔鄧攸爲郡。載米之官。惟飲吳江水而已。非無俸祿之患。惟無廉節之憂。吾食汝勿以尤長官也。可謂教以義方矣。

湯長卿。字體仁。寶祐四年進士。累官江南廉訪使。勝殘撫善。民德之。始家松湖。罹兵燬。徙邑居藍家巷。與文山善。同舉義兵。卒。

豐城縣志

卷十 人物

十

王義端。字元剛。與兄義山。景定二年。聯名鄉薦。仕至綏寧令。德祐丙子。避地章貢。一日。詣憲使自堂。陳杰適吉水。械劫盜七十餘人。至命幹官王垆。議置於法。義端問曰。非二趙事乎。杰曰。然。曰。是則兄弟之郤。非寇也。某昔事此邑。有趙簿與銀。以事羈管邵陽。或謂其弟與鋤。擠之赦還。兵興。鋤盡室之贖。銀謀報復。率群僕焚其廬。是兄弟修怨。罪不專在從也。可盡殺乎。復說垆曰。君毋以人命奉長官嗜殺立威也。晉公保彥。卿不反。卒應三槐之讖。其可忽諸。居無何有。羅拜於前者。謹曰。公活我革。感泣而去。

陳斗月字性之干陂人舉紹定四年鄉薦與泉谷徐鹿卿比屋薦致軒李登松麓李龍庚魯齋袁漸十有八士爲青雲文社皆一時名流子霖字憲甫擢咸淳乙丑進士興國州判官。

熊彬字彬卿號墨莊南岡人力學有師道數邑後進皆從之游。月有義試評覈精詳行之五十年多所成就。陳友沅字直翁上坊里人篤學力行。景定二年鄉舉。乙亥兵興毀家給民伍捍隣寇渠魁就殲。脇從悉舍之。人以爲德。所著有春秋集傳等書。

熊大經字仲常拏岡里人。舉寶祐六年鄉薦。以恩科主

豐城縣志

卷十 人物

十一

建陽簿。時後村劉克莊爲宰。大經推誠贊理。見義勇爲後村。嘗移書曰。某試邑非才。惟主簿。忠告善道。顯助陰扶。置此身於無過之地。爲力最多。轉龍泉令。廣西憲司幹。尋致仕。號胖齋。

李龍庚字彝甫。新城里大陂人。舉紹定元年鄉貢。甲辰補太學生。淳祐末。謝方叔當國。龍庚叩闥上疏。言方叔耄昏。子姪縱欲。敗度交通賄賂。掩抑公論。條上五欺十賣之罪。京尹承風羅織。興獄少司成蔡抗率屬爭之。獲免。未幾方叔竟罷。丙辰以特奏奉廷對。詳定官擬之第一。俄置第三。甲子丁卯。兩與江廣漕薦以

桂陽軍判官。終於官。子毅通字幼剛。登景定三年進士。任蘄黃縣尉。終撫州推官。階文林郎。爲文有家法。爲江州司法叅軍。時奉母之官。載米以養。攝瑞昌宰。臘雪艱食。勸所親厚者。各從隣巷量輸之。

胡大訓字世文。旗塘人。領紹定鄉薦。性剛直。秉道嫉邪。遊國學。時憤權奸史嵩之奪情起復。同黃愷伯等上書數其罪。被逐。作捲堂文。辭先師歸。隱於桂陂。

涂應雷字復亨。石陂人。登景定進士。授萬安尉。清遠簿。英德推官。知番禺縣。在清遠時。臺臣劾新會宰攝廣南。倖大貪酷。爲南中官吏之最鑄罷。送憲司徵贓。不伏辜。

豐城縣志

卷十 人物

十二

徐思立字志夫。覺陂人。登景定進士。授南雄教授。改臨江。時丁大全當國。值諫官與諸生叩闥攻之。有旨戒諭立石學宮。思立爲書抵祭酒。反覆萬言。請轉聞以申公論。於是十年不得志。德祐初。改奉議郎。尋除武學博士。罷歸。有山房雜著若干卷。

范壽字子洪。查村里人。教諭奉新。時釋老之勢方張。寺僧豪奪學田。持訟數歲。適宣政院專官根勘寺產。逮壽詰問。壽無遜悞語。徐出載籍。指陳使者。怒執其籍。

壽曰。此當與吾同死生。若執之。必叩聞求直。非所憚也。援時宰以證宰相。遽命還之。田得不奪。

范宜損字處約。一字德修。畚坑人。慷慨有大畧。善談論。爲文清新雅健。意氣動盪。以書謁淮閩。賈似道竒其才。補進義校尉。尋授會昌征官。攝安遠令。罷弊例五十餘條。補解通賦八千餘緡。立學舍三百六十楹。登咸淳進士。授蘄州法曹。轉湖廣總領所幹官。分司岳州。江上宿師百萬。供給不匱。宜損才識絕人。遇事繁劇。立辦。官止刑部架閣文字。自號意城。

熊汝屋字兌夫。南岡人。號習軒。擢咸淳進士。授崇陽簿。豐城縣志

卷十 人物

十三

六經不釋手。一月一過。讀學徒皆爲聞人。李義山嘗受學於其父瑁。及李漕湖南。汝屋留其幕。有僧以楮鏹萬緡求通關節。汝屋毅然曰。吾與李公世道義交。何可以利相浼耶。

王定孫字靜翁。咸淳三年湖南漕鄉貢進士。贛州司征貴溪縣尹。福建鐵冶。提舉邵武錄事龍溪尹。初仕貴溪。參用舊典。貴人安焉。平反邵武。何姓殺債主而誣其妻之獄。在龍溪盜掠。晉江許祥德家。盜逸逮百餘人。死者十二三。會民有南去不及偕往者。歸母媪。以訴詰之。并得掠許氏盜枉者以釋。先是盜發隣境。雲

中孫萬鎰爲憲司書史。沿檄招捕。或作劍水澄清頌。刻石郡庠。後數年頗以刻深損譽。一日會明倫堂。孫偶一語。侵定孫。定孫面數所爲事。戾於理者數十。引椎碎碑而出。宦遊四歷。劇任皆具資裝以行。所至秋毫無取。處事據理。不爲利誘。不爲勢怵。號琴逸。

張弘毅字通父。居郡郭。咸淳進士第。授瑞金尉。自堂陳杰持江右憲。節發豐城。委擿吏奸。乃悉逮繫。鞠獄具服。雁鷺之群遂空。

徐純字汝一。伯琛適子。博學善篆書。謹言信行。臨事精敏。咸淳推排田土。曠歲怠事。邑宰黃吳老以正信。一

豐城縣志

卷十 人物

十四

鄉委純提督行之有緒。踰月而集里中。龍澤山間有徐孺子讀書堂故址。相族伯內翰公構屋以淑來學。元初以萬一鶚教授隆興。招之講議。晚歲終窶。自固澹如也。號在軒。

孫素字少初。咸淳末以進士貢。不第。平生多撰述。詩文若干首。清江皮潛爲刻版以傳。吳草廬有序。

徐欽字汝敬。伯琛季子。家藏書數萬卷。無不覽記。工詞賦。通六經。試胄監。叅大學。明善齋。內侍董宋臣除押班。主管太廟。及國信所都大提點。欽率同舍生抗疏。言國信不可付闍寺。內臣不可與兵權。主管太廟不

可用刑餘不祥人。再疏不報入。元不仕。開梧陽精舍。集生徒。延老成爲之師。更相訓誨。寇藪未息。郡盜再過門。適外戶未閉。皆斂戢去。沒年八十九。

陳雄飛字鑑之。井岡人。弱冠入郡庠。與同舍生星渚牛斗南。高安幸元龍文詞。常相頡頏。教授於鄉。規範端嚴。誠意懇到。來學之士皆充然有得。杜門不事請謁。嘗賦詩云。處順心宜逸。無求道乃高。可想見其人。李嗣俊字士愚。苦竹里人。舉胄監。都城旱。詔求直言。上書乞立濟王後。收召言路。逐臣罷。龍翔宮土木。荆湘帥陳鞞縱軍毒民。請逐之。行臣說五日不兩。斬臣首。

豐城縣志

卷十 人物

十五

以正欺君之罪。弟嗣良字士愷。舉嘉定三年鄉薦。陳煥字時可。先世福州長溪人。和易博洽。黃謙父重其爲人。爲築館以居。十年兩與鄉漕薦入元。不仕。隱居瓘山。熊剛中卒後進。闢塾師事之。取生平著述定爲易書詩禮四書補註。嘗謂學者率信先儒而疑夫子。故講說必原。夫子之意不苟。隨先儒議論。學者稱瓘山先生。

范仕衡字平甫。楂村人。性至孝。父歿。出必泣。告於墓而後行。母疾目久不愈。乃祈於神。以藥方授。忽不見。服之遂愈。特奏名授欽州推官。攝二守。咸著廉幹之譽。

按省志仕衡未嘗登進士。即舊志科第亦無仕衡名。傳中忽稱進士者誤。今特改正。

熊炎字時中。瓘山里人。試補太學生。授靖安教諭。攝縣事。復教授瑞州。八年遷廣東儒學副提舉。同知英德州。嘗摭傳記所載孝節忠義廉循吏爲六傳。尚左丞。謂有補風教。

按此熊炎與嘉定四年進士之熊炎氏號里居。官職全不相同。明屬兩人。省志傳內作嘉定進士誤。徐可久字心易。曲江人。其先祖雍。自金華徙武寧。乃黃文節公山谷之甥。及孫郃。金紫光祿大夫。吏部尚書。

豐城縣志

卷十 人物

十六

贈少師謚忠愍。居豐城故縣。鑿義井。修橋道。鄉人德之。可久十歲通經大義。及長。旁涉諸經史。邑人雷尚書。宜中宗人。徐提刑。經孫。竒其才。辟爲當塗令。歸老卒於家。至正三年。揭文安公爲立石以識其實。

熊如淵。一作汝淵。字文博。南岡里人。國子生。天性剛直。濟以和易。家之有無不計也。里中舊祠徐孺子。胡文定公於龍澤山間。如淵乃斂粟買田以永祠祀。有家傳家乘。存稿若干卷。

蔡恂。如字若恂。菟湖里人。以學問承家。以禮義律身。氣貌剛毅。矩度嚴肅。有不可犯之色。而交友和。待人恕。

爲文師。昌黎鬱然遠韻。乙亥兵興。時仲弟雍如補河源令。挈家入南依之。

揭道孫字志□。業進士。落筆千餘言。世革伎無所施。則徜徉山水幽處。痛飲狂歌。後乃還治農圃。教授鄉里。每食舍肉歸。以遺親。親歿事兄如父。事姊如母。姊寡有子十歲被俘。極力徧求弗獲。養姊於家。終其身。作堂名廣思。歲時於中序族。年逾四十而鰥。不再娶。嗜佛書。酒肉俱斷。

按道孫並未仕元。舊志竟列於元人物之首。不反沒其痛飲狂歌之心乎。今特改歸於宋。

豐城縣志

卷十 人物

十七

元

熊朋來字與可。善坑里人。登宋咸淳進士。授從仕郎。寶慶僉書判官。未任而宋亾。元世祖初得江南。盡求宋之遺士。用之尤重進士。朋來不肯表暴苟進。隱處州里。生徒受學者常百數十人。取朱子小學書提要領。以示之學者。家傳其書幾徧天下。時來鎮豫章者。多名公卿。皆以客禮見。憲使魏初與朋來遊東湖上。朋來指北崖曰。徐孺子故居在焉。太守陳蕃之所表。而里門西南出曰桂華坊。無所當矣。魏知其意。更表爲高士坊。會朝遣使定閩廣。選校官當路以名薦。遂命

相繼任兩都教官。以擬安定蘇湖。任滿部銓建安簿。不赴。後以福清州判官致仕。自號彭蠡釣徒。日鼓琴以自怡。遠近學者來益衆。博通群籍。尤深於三禮。當時言禮學者咸宗之。每嘆詩樂無傳。倣朱子所得趙彥肅家二十四譜。增二十詩。俾皆可歌。又補孔廟釋奠升歌樂章。春秋各按月律。合調迎神。至送神通十。八曲。部使者以之徧行於諸郡。嘗譜考槃蒹葭衡門。白駒四詩。以寓己意。學者稱爲天慵先生。卒時遠近會葬者千餘人。

按朋來邑善坑人。吳草廬表墓止稱豫章。及見他文字亦然。竊嘗疑之。一日偶閱揭文安銘熊召子之墓。謂召子少豫章先生。朋來十二歲先生。世與公連牆以居。後家郡中。先生每歸里必舍公所。公至郡中必舍先生所。兄弟自爲知己。疑乃釋。蓋朋來爲邑人。兒童婦女能言之。其家郡中則人不能盡知也。後其子孫仍歸善坑。朋來造詣極深。一時未見其比。月湖楊廉識。

熊召子字南翁。朋來弟。博覽載籍。好論古今事。性伉直。辨是非。枉直如別黑白。雖大官豪吏一語失度。即面析琅琅不少屈。人亦服其公正。莫敢怨與。天慵先生

兄弟自相師友。鄉里稱之曰靖逸先生。

王義山字元高。槎爨人。通易學。工詞賦。淳祐景定間。四與漕薦。登景定進士。知新喻縣。歷永州戶曹。至江西。帥司叅議官。分司贛州。入元。奉行省檄。提舉江西學事。寓居東湖。環所居皆種白蓮。名其堂曰君子。初宰新喻。有訴僧紹南還俗者。義山判云。紹南棄異端。從吾道。人其人不亦可乎。東安縣民曾殺人。賄用家僮承大辟。義山訊得實。僮免死。湘潭縣豪民併李田。不遂獻之學縣。受之。李訴於臺。縣以告先聖之文來上。義山擬春秋齊人來歸汶陽之田。釋者謂書來歸者。

豐城縣志

卷十 人物

十九

心悅而歸之也。李非心服先聖其肯受乎。以還李氏。湘俗信巫。歲用人於淫祠。事覺罪祭者。不及巫。義山謂巫實殺人。按法坐之。其風遂殄。自號稼村。學者稱稼村先生。未卒前數月。自爲墓誌。

按舊志列王義山於宋人物。以其與弟義端俱宋科第而出仕者也。但義山入元。奉檄提舉江西學事。則已儼然元人矣。今故繫義端於宋。而繫義山於元。其洪淵熊介諸傳悉照此例。

洪淵字淵甫。號沐齋。邑鄆人。舉宋咸淳鄉進士。爲瑞州西澗書院。長入元。爲富州儒學教授。致仕。耽邵子易。

學。揭先天方圓圖於屋壁。扁曰環中。年八十一而卒。所著有環中集十卷。其文援引該博。議論瞻蔚。如江漢波瀾。滾滾不竭。

熊介。字元靜。圭湖里人。登宋咸淳進士。授理定縣簿尉。攝崇仁縣事。入元爲縣尹。豐城陞州。爲教授六年。嘗有寫真者。圖其貌。索贊。引筆書曰。子方之介也。隘守道之介也。恠不隘。不恠是爲熊介。號梅境。

夏益朝。字德全。以四川重慶府籍中。宋咸淳六年鄉薦。登十年黃龍澤榜進士。未幾世祖初得江南。延攬宋之遺黎。重用宋之進士。選用益朝爲富州教授。以文

學名於上司。凡序文傳記。悉命益朝筆之。所作甚富。上司每嘉之。曰。益朝書讀五車。堪充六館之選者也。月與諸士督課程。較優劣。咸服其明。立班次。均勞逸。又服其公。其間如徐公汝士、黃公菊莊、張公異等輩。皆先生所甚竒者。延祐泰定間。果後先登科第。尤見知人。捐俸修葺學宮。諸士有貧不能娶。不能葬者。輒捐助之。當道益廉。其行屢薦。館選力辭不。就在任九年。給文致仕。留家富州之南巷。與揭學士溪斯往來。莫逆。號爲忘年交。益朝生平守己。讀書五經。諸史無不淹貫。時稱博學。居家以孝友稱。居鄉以謙讓名。至

訓子孫則著四書五經明解。日與講究。而一時諸俊髦求決經書疑義者。絡澤不絕。且晚節益堅。滅跡公室。州守器之。屢請詢民膜不赴。家居二十餘年。享年八十有八。正襟危坐而卒。

揭來成字哲夫。溪斯父。宋鄉貢。以子貴累贈通奉大夫。江西行省叅政。仁宗朝集賢學士陳顥等上言翰林揭溪斯之父來成。學行師表一方。宜特賜謚。以示尚德之意。有旨賜謚貞文先生。處士易名之典。自來成始。

鄔至善字止善。故里人。延祐初。御史程鉅夫以經明。行

豐城縣志

卷十 人物

二十一

修薦於朝。授中書照磨。累遷至刑部侍郎。先是丞相鐵木迭兒恃權橫恣。縱子奸利。官貯軍糧。私取貴鬻。朝野側目。莫敢發聲。甚有以子弑父者。顯然受其賂。錢脇刑曹易詞以貸其子罪。至善素剛介忠直。見重於時。適來部力持不可。且上章條其罪狀。於是丞相銜之深。欲致之死。無間會從。帝幸上都。乃佯托曹務邀與共食。飲密置鳩。至善不覺。甫歸邸。以毒發而卒。訃聞。帝不問。命葬於翠屏山之陽。

廖立孫字幼興。至元十九年鄉寇大作。立孫負母冒白刃逃難。及安靖。孝養終身。與江革不殊。揭翰林曼碩

題其墓曰。有元純孝廖立孫之墓。又爲作詩刻石。揭傒斯字曼碩。揭源人。父來成。宋鄉貢進士。父子自爲師友。貫通百氏。早有文名。大德間出遊湘漢。湖南帥趙淇雅號知人。見之驚曰。他日翰院名流也。程鉅夫盧摯先後爲湖南憲長。咸器重之。鉅夫因妻以從妹。延祐初。鉅夫與摯列薦於朝。特授國史院編修官。時平章李孟監修國史。讀所撰功臣列傳。嘆曰。是方可名史筆。若他人直謄吏牘爾。陞應奉翰林文字。遷國子助教。傒斯凡三入翰林。朝廷之事臺閣之儀。無不嫻習。集賢學士王約謂與傒斯談治道。大起人意。授

之以政。當無施不可。天歷初。開奎章閣。擢爲授經郎。以教勲戚大臣子孫。文宗時。幸閣中。有所咨訪。奏對稱旨。恒以字呼之。而不名。每中書奏用儒臣。必問曰。其才何如。揭曼碩間出所上太平政要策。以示臺臣。曰。此朕授經郎揭曼碩所進也。其見親重如此。富州地不產金。官府惑於奸民之言。爲募淘金戶三百。而以其人總之。散往他郡采金。以獻歲課。自四兩累增至四十九兩。其人既死。而三百戶所存無什一。有司遂責民之受役於官者。代輸。多以是破產。中書因傒斯言。遂蠲其征。與修經世大典。特授藝文監丞。參檢

校書籍事元統初陞集賢學士及開經筵再陞侍講學士同知經筵事經筵無專官曰領曰知多宰執大臣微辭奧義必屬奚斯訂定而後進其言往往寓獻替之誠務以裨益治道年七十致其事而去詔遣使追及於溲南還撰明宗神御殿碑詔修遼金宋三史奚斯與爲總裁官毅然以筆削自任凡政事得失人才賢否一律以是非之公至於物論之不齊必反覆辨論以求歸於至當遼史成有旨獎諭乃督早成金宋二史奚斯留宿史館朝夕不敢休因得寒疾七日卒制贈護軍追封豫章郡公謚文安奚斯少處窮約

暨有祿入衣食稍踰於前輒愀然曰吾親未嘗享是平生清儉至老不渝友于兄弟終始無間言立朝雖居散地而急於薦士爲文章叙事嚴整語簡而當詩尤清婉麗密善楷書行草朝廷大典冊及元勲厚德當得銘辭者必以命焉殊方絕域咸慕其名得其文者咸以爲榮子泐

揭泐字伯坊奚斯子善書工古文詞以廕補秘書郎遷國史編修歷官至福建廉訪司使守建寧僞漢陳友諒兵寇松關建寧受圍吏民相繼出奔泐與經略使普顏不花協謀禦賊設方略復延平等三州改江西

行省未赴。以工部郎中召。時淮浙亂道不通。留家明州之慈谿。與子樞浮海趨遼東。爲倭寇所掠。同舟之人皆遇害。獨泐父子得免。戊申秋。明兵下都城。大將驛送於朝。安置浙東慈谿縣。既而召往鳳陽書皇陵碑事竣。賜白金五十兩。復還慈谿卒。

李克家字肖翁。湖茫人。嘗率衆爲同文書院於州城之東。以訓鄉之子弟。後以文學任本縣儒學教諭。陞遼陽儒學提舉。所著有續豐水志。

熊太古字隣初。朋來季子。舉至順三年鄉薦。南臺御史平章趙子敬辟爲廣東廉訪使書史。轉湖廣省掾。授

豐城縣志

卷十 人物

二十四

翰林編修國子助教江西行省員外郎。元末兵起。遂隱櫛山著書。洪武庚戌。徵較雅樂畢。告老歸。終於家。甘朝舉字士廉。邑鄆人。天歷間以學行舉官。至嘉定知州。嘗爲廣西帥幕。蠻獠咸信廉介。著聞。時論翕然推之。

熊自得字夢祥。橫岡里人。博學強記。尤工翰墨。得米老家法。而興致幽遠。元末以茂才異等薦爲白鹿洞書院山長。授大都路儒學。提舉崇文監丞。以老疾歸。年九十餘。著有柝津志。

徐智字明初。曲江人。十五歲於經書諸子無所不讀。至

元二年。行省尹陳元凱以明經薦富州。直學調連溪書院。山長三爲嶺南簿。轉吉安路同知。致仕有廉聲。徐得中字養心智之子。力學正直。和而不流。元未年以故官之子任隆興路東門巡檢。

李廷瑞字雲紀。新城里人。積學敦行。爲時所重。教諭新建廣昌縣。兩庠師範。比於安定。徙長南劍延平書院。以母方氏。春秋高辭不赴。母歿。廬墓踰年。有白蓮生廬前田畝中。華葉蕃盛。人以爲孝感所致。揭學士僊斯爲作白蓮詩。

陳仲易杰之孫。博通經史。嘗授徒於豫章杏花村。從學豐城縣志

卷十 人物

二十五

者不遠千里。雖蒙古色目人亦有與焉。每以己貲給學者。同時熊復以五經教授鄉里。聚徒數百人。著春秋成紀以惠後進。門人稱爲西雨先生。與仲易齊名云。

熊鈞正。馬湖里人。性穎敏。力究性理之學。嘗有人問世間何物爲大。荅曰。道理最大。以學行任吉安路儒學提舉。致仕終於家。有一齋集。

于有信字盛卿。號光國。竹國五世孫。由江西行省掾授承務郎。臨江路經歷。都昌縣尹。時邑大旱多饑殍。奏發粟以賑。民無流徙。以政績異等陞奉議大夫。集慶

等處都財賦提舉。轉隆興路治中。致仕終於家。二子皆廕授。長汝賢。武寧縣尹。次汝能。從仕郎。贛州路會昌州判官。

朱隱老。字子方。善之父。幼讀書。膏油不給。輒挾冊映月讀之。冬則拾枯薪。及蕪松明以繼。時姚江村洪泳齋。趙冽泉。涂桂莊。皆宋之遺老。淹通六藝。隱老咸執經相叩。久之。心與理涵。如辨黑白。精易禮。及邵子先天橫渠正蒙諸書。所著有易說。禮說。皇極經世書說。平生一踐場屋。不中。遂棄去。倡明道學。於荷山之陽。四方學子悉從之遊。稱灑山先生。至正壬辰春。江淮兵

豐城縣志

卷十 人物

二十六

動鄉里。惡少年爲變。殺戮至雞犬不遺。耄倪皆竄。隱老猶操觚。正衣冠而坐。從容語抄掠者曰。貲財任取。書籍非汝所好也。及後再至。三至。隱老曰。吾家已罄矣。汝幸他之。盜笑而去。臨歿語其子善曰。吾以數推明年江西當大變。宜謹避。以免難。語訖而逝。及僞漢陳友諒陷南昌。果如其言。

按揭哲夫先生。爲曼碩之父。朱灑山先生。爲一齋之父。俱以學行師表。一方德望推重。後世淵源家學。有所自來。不容湮沒。從前志書。皆不載。茲據省府志補入。

甘惟寅字孔夙。邑鄆賢能坊人。號安所。止薦實學同。弟仲夙。從進士陳植遊於龍光書院。遂得正學之傳。與朱善劉秩毛吾魯諸賢相友善。邑令林弼常稱之曰。識之正志之定。隨所遇安其命。入明屢薦不起。熊師賢字君佐。元廢科。舉師賢絕意仕進。誦讀自樂。扁其堂曰寓樂。琴書圖畫羅列左右。尤嗜古器玩賞。學琴後不復操。曰。但識琴中趣耳。生平專力於詩。吳文正謂師賢詩冲淡蕭散。不事雕琢。而近自然。酷與其人相似。

朱本字致真。邑鄆城西人。性行純實。篤於理學。祖邵程

豐城縣志

卷十 人物

二十七

而定八經之世。次皆濂洛。關閩諸儒所未發。至正間用薦授福州路儒學提舉。元末兵起。本偕妻子歸。遇寇妻袁氏。義不受辱。溺於河。子被虜。本獲脫。還終身不娶。洪武初。薦至京。太祖欲官之。固辭忤旨。安置和州。後賜歸。授徒鄉里。雖隆寒盛暑。不輟。家故貧。淡然自安。年九十終。著有皇極經世。太極圖通書解諸集。徐彥威嘗師事朱致真。洪武壬申。洪水將入城。偕友鄭德隅往省。其師於城西。師言爾家城中地益卑。宜歸。凡三遣乃去。比歸。巨浪洶湧。時已四鼓。慮師必厄於水。復與鄭駕舟往救。俄而舟覆。鄭緣木免。徐竟溺死。

按彥威無他事可傳。特以救師隕命。其義足嘉。舊志故爲之立傳。但既師事元人。朱本雖溺死於明。而實未嘗仕明也。應附其師傳後。不得列爲明人。

豐城縣志卷十終

豐城縣志

卷十 人物